

tum vero intelligere potui ex Introductione ejus, vult construere methodum naturalem, cujus Classium Characteres ex toto plantarum habitû et omnium partium structura desumantur, deinde quamlibet talem classem naturalem subdividat pro lubitu, si possibile, in subdivisiones naturales, sin minus, ope notarum artificialium, continuando tales divisiones ad ipsas species, nullo habito respectu ad certum talium subdivisionum numerum, sive Ordines et Genera; subdivisionibus majoribus nomina imponat, reliquis et inferioribus nulla.

Præter talem propriam methodum naturalem varias quoque aliorum Botanicorum methodos artificiales sed quam maxime abbreviatas afferat, v. gr: Tuam Sexualem vel secundum mentem ejus à Staminibus solis, aliam à petalis, aliam à Calyce, aliam à fructu; Ex qualibet tali methodo artificiali tantum allegare vult Nomina Classium et Ordinum, simulque unam alteramve harum subdivisionum, minimè vero Nomina Generica sed horum loco numeros, qui respiciant locum Plantæ in methodo naturali. Nullas adhuc vidi Figuras Plantarum Norvegicarum, sunt quidem nonnullæ harum excusæ, sed nondum divulgatæ. Figuras solas sine nominibus et Descriptionibus primò fasciculatim seorsim edere vult, sc: 60 in quolibet tali Fasciculo; post 6. l. 8 annos methodicum Catalogum harum Plantarum (NB. tantum in Dania et Norvegia sponte nascentium) divulgare promittit; Hic catalogus contineat prædictas methodos sc: naturalem et plures artificiales, Synonyma, Loca natalia, Nomina Incolarum; non tamen debet esse majoris molis, quam ut instar Libri manualis facile crumena capiatur, hujus enim ope plantæ Danicæ recentes in Loco natali in campis, agris, sylvis etc: examinari et cognosci debent. Proxima hyeme ex Norvegia Hafniam redit D. Oederus. Postea D. Oederus, Prof. Ascanius, D. Jensenius medicus Nosocomii Regii et ego conjunctis viribus in edendo magno opere Botanico ad Floram Danicam pertinente collaboremus, sc: quicumque nostrum præsentis fuerint, quem in finem 2plici vice qualibet hebdomade conveniamus.

Jam demum in lucem prodiit Opus conchiologicum Regenfusii Textu atque Explicatione non à Kratzensteinio sed à D<sup>no</sup> Cramero Concionatore aulico confecto. Dum enim